

## Gui'ch yaløj bacaa San Pedr

### *Rxhiaal Bëd xtiidx Dios loj ree bejn*

<sup>1</sup> Naj Bëd, najn tijb xi apóstol Jesucrist, laaman guxhaal naj, cucan gui'ch guie par lëjt najdi bén bire'ch gra lad abi' zojbidi guiedx riga' ree niz Ponto, Galacia, Capadocia, Asia Menor në Bitinia. <sup>2</sup> Ma gulej dux Dad ree Dios lëjt diizd gocli, zi'c goc xixgabaman. xSprijtaman gulëëca lëjt din guzoobidi diidx gac tëë luxdoodi naya delant lojman por xrejn Jesucrist. Zro' güünle' Dios lëjt yabe'cdxe tëëman luxdoodi.

### *Ni ralëjz ree gunee Dios*

<sup>3</sup> Quixtëë Dios xdad Dad Jesucrist, guial rayaman dunuj ree. Laaman bachaa mod nabajn ree guial baban Jesucrist loj ree bengüt, zeel zro' naj ni ralëjz ree gunee Dios. <sup>4</sup> Abi' yaca' ree ni nagu'chaawaman xanyabaa par dunuj ree, laan naj ni naya gra tiamp, ad rxintan, ad yu' tëët dxej nitan. <sup>5</sup> Guial rliladxidi Dios, laaman rnij lëjt con xguialrniabeeman, din chi guidxin dxej nit guidxliuj, dxel gagbee gra bejn guial ma beenman lëjt perdon.

<sup>6</sup> Zeel rabaa da'tidi majsi tëdidi graloj guialrzagdiaj tiblädëd, <sup>7</sup> din por guialrzagdiaj guin guiguien chu diidxli rliladx Dios, zi'c rüjnnë reeman or, rudëëd reeman laan loj bajl din gagbee reeman bal najn ganax or. Or guin najn ni rnidloj, zeel mazri lasajc guialrliladx laaman, bal chu taan xhietëëz loj guialrzagdiajn, din ad yu't dxej nit xguialrliladxidi. Abi' dxej gui't Jesucrist stijb, lasa' guialrliladx guin naj ni ruladx Dios, guiáad ree bejn në ree anjl guza't reeman laaman zagdxë gap tëë reeman laaman respejt guial rusnuu rliladxidi laaman.

Gui'ch yaløj bacaa San Pedr 1:82Gui'ch yaløj bacaa San Pedr 1:18

<sup>8</sup> Ad waguiaatidi Jesucrist per rëndi laaman, abi' yan rliladxidi laaman majsi ad waguiaatidi laaman, dád nix yu' luxdoodi abi' tant nix yu' luxdoodi, xt ad radxejlt xhienaag guiëbidi, <sup>9</sup> din lëjt ragbee, guial rliladxidi, ma nüjn Dios lëjt cwent zi'c ree bën achet xtol.

<sup>10</sup> Diizd gocli, bën badëë ree xtiidx Dios loj ree bejn basiid reeman been tää reeman naguiejn niagbee reeman xhienaag güün Dios bejn ree perdon, abi' rëb reeman xhienin güün Dios par lëjt guial najman benza'c. <sup>11</sup> Por xSprijt Jesucrist gogbee reeman diizd gocli guial sagdiajman zianz qui gapraman guialrniabee, dxel been reeman naguiejn niagbee reeman chu benan sac zian goc tää gac zian. <sup>12</sup> Per balüü Dios laa reeman guial ni gunee reeman ad najtan par laagajc reeman, najn par lëjt, abi' yan lëjt ma rignia'di ni guin ree por ree bën catie'ch xtiidxza'c Jesucrist por xguialrniabee Sprijt zëed xanyabaa. Në ree anjl ma rën nejzdoo gagbee nine ree.

### *Ze rayal guiban ree xi'n Dios*

<sup>13</sup> Zeel gol guzusin gol bastëdguien tää, con guidib luxdoodi gol gulëjz ni gunee Dios guial najman benza'c, dxej gui't Jesucrist stijb. <sup>14</sup> Zi'c ree xi'n Dios nazobdiidx reeman, ad bal guibanridi zi'c gubandi gocli chi gadidi güünbee laaman. <sup>15</sup> Laaman gule lëjt, zeel gol been naguiejn guibandi naya delant lojman, din laaman naj bën naya nali. <sup>16</sup> Zi'c rëb loj xtiidxaman: “Gol gubajn naya delant lon, din naj naj bën naya nali.” <sup>17</sup> Yan bal rnieedi Dios “Dad”, bën rüjn xguialguxtis tibloj, bal conin rüjn tijb gaj bejn, rayal gapidi laaman respejt guidib tiamp guibandi loj guidxliuj guie. <sup>18</sup> Din lëjt ragbee guial babëëman lëjt loj costumbr ni basa'nnë ree xbéngulalidi lëjt, costumbr ni ad rüjnt ree sirv, abi' lëjt ragbee guial gojx din yariidi loj reen, per ad gojxt con ree ni rnijt,

Gui'ch yaløj bacaa San Pedr 1:193Gui'ch yaløj bacaa San Pedr 2:4

zi'c or o plajt ya, <sup>19</sup> gojx con xrejn za'cdxoon Jesucrist ni guxhie'man loj crüjz chi gütaman zi'c tijb xiil zagdxe be ad naxint, be rugüjt reeman par Dios por xtol ree bejn. <sup>20</sup> Diizd chi gad guidxliuj gacchaaw, mal gulej Dios laaman din sacaman zian, yan ma guzajcaman zian guial rënman lëjt. <sup>21</sup> Zeel por laaman rliladxidi Dios bën basban laaman badëë tëëman guialrniabee lojman, yan con guidib luxdoodi ma rliladxidi Dios rbëz tëëdi ni guneeman.

<sup>22</sup> Yan, guial ma ruzoobidi xtiidxaman ni naj diidxli, ma naya luxdoodi delant lojman din guiën lasa'di zi'c rayal, zeel gol guyën lasa'di con guidib luxdoodi. <sup>23</sup> Din ma bidxaa mod nabandi, zi'c rulüü gojlidi stijb, abi' guialnaban zinalidi ad zëëdtan por tijb bën nit, zëëdan por xtiidx Dios, diidx naban, diidx ni ad zanijt, <sup>24</sup> din loj xtiidxaman rëb:

Gra bénguidxliuj naj zi'c gui'xh dajn,  
guiáad ni rajp reeman naj zi'c xguiaa gui'xh guin.  
Rbidx gui'xh guin, abi' riabj xguiaan,  
<sup>25</sup> per xtiidx Dios ad yu't dxej nitan.  
Abi' laan naj xtiidxza'c Jesucrist ni ma biguejndi.

## 2

<sup>1</sup> Zeel gol basa'n gra ni mal, gra ni rusquiee, ad bal rüjnzidi, gol basa'n guialnadëdloj në guial rnieeguijdx lasa'di. <sup>2</sup> Zi'c re'c ree xindo quigojlnejzri dud, zian gol been naguiejn chignia'di xtiidx Dios, din gusnuu gagbeedi mazri xhienaag rayal guibandi din yabandi loj ree bengüt con gra ree bën nuchajg Jesucrist chi gui'taman stijb, <sup>3</sup> bal walidi ma ragbeedi guial naj Dios benza'c.

*Jesucrist naj zi'c guiaj naban*

<sup>4</sup> Gol bibig loj Jesucrist, laaman naj zi'c guiaj naban. Been ree bénguidxliuj laaman tibläd, per par Dios najman

Gui'ch yaløj bacaa San Pedr 2:54Gui'ch yaløj bacaa San Pedr 2:12

bén lasajc, laaman gule laaman. <sup>5</sup> Ziangajc lëjt, guial ma rililadxidi Jesucrist, najdi zi'c ree guiaj naban ni cayajcnë xyadoo Dios. Najdi bixhioz naya luxdoo rüjn sirv lojman, din nabandi zi'c ruladx Dios, laan naj ni rudëëdi lojman zi'c gon por Jesucrist. <sup>6</sup> Rëb loj xtiidx Dios:

Gol baguiaa, guzoban tijb guiaj zagdxe luguiedx Jerusalén. Laan naj guiaj nabee, guiaj zojbloj, nilasajc tëë.

Bal chu chililadx laan,  
ad yu't dxej yaya'nxtuman.

<sup>7</sup> Par lëjt, guial rililadxidi Jesucrist, laaman naj zi'c guiaj lasajc da't. Per par ree bén ad rililadxt rajc cumplid ni rëb loj xtiidx Dios, lod rëb:

Guiaj ni gulëëgo'n ree bén rüjn yu,  
yan laan naj guiaj zojbloj.

<sup>8</sup> Rajc tëë cumplid ni rëb stib lajt loj xtiidxaman, rëban:  
Laaman naj guiaj rirejl guia' ree bejn,  
abi' rureeyujn laa reeman.

Rzajc reeman zian, guial ad ruzoobt reeman xtiidx Dios,  
zian rajc ni rëbaman xcwent reeman.

<sup>9</sup> Per lëjt naj bén guleman, najdi bixhioz rüjn ree sirv lojman, guial najman dux rey ree. Lëjt ma naya luxdoo delant lojman, abi' gulejman lëjt din chigtie'chidi diidx xcwent ree ni zagdxe rüjnman. Laaman babëë lëjt loj nejz mal, persi bagu'man lëjt loj xnejz za'cdxoonman. <sup>10</sup> Gocli achutczí najdi, per yan ma najdi xbejn Dios. Gocli ad ragbeetidi guial raya Dios lëjt, per yan ma ragbeedi.

### *Zi'c rayal guiban ben rililadx Dios*

<sup>11</sup> Gradi compniar raliduladx ree Jesucrist, rniaaban favor lojdi, zi'c zio'p ree loj guidxliuj guie tibrajtzi, ad bal tiëbidi güün ree xgab mal lëjt gan, din xgab mal guin ree rüjn naguiejn zianczi din gusa'n ree bejn xnejz Dios. <sup>12</sup> Gol gubajn zagdxe loj ree bén ad nünbeet laaman, zian majsi

rnieeguijdx reeman lëjt yan, rëb reeman najdi benmal, per chi guguaa reeman guial zagdxë naj ni cayüjndi, dxel guza't reeman laaman zagdxë, dxej ni yadëöd reeman cwent lojman.

<sup>13</sup> Guial rliadxidi Dad Jesucrist, gol bazoob xtiidx gra ree bën rniabee loj guidxliuj guie. Gol bazoob xtiidx pristent rniabee xnaciondi <sup>14</sup> në xtiidx gobernador bën rxhiaalaman din gudëödaman casti bën rüjn ree ni mal guilies tëëman xvalor ree bën rüjn ni zagdxë. <sup>15</sup> Din rën Dios güüнди ni zagdxë ree din gucwëözidi ro' ree bentont ad rignia't abi' rnieeguijdx reeman lëjt.

<sup>16</sup> Zajc güüнди zi'c rëndi, per ad por ziantzi güüнди ni naj ni mal, gol been zi'c rayal güün ree xbejn Dios. <sup>17</sup> Gol gojp respejt gra bejn zi'c rayal, gol guyën ree bën rliadx Jesucrist, gol bidxeb Dios, gol gojp tëë respejt pristent rniabee xnaciondi.

### *Gol gudaan loj guialrzagdiaj*

<sup>18</sup> Lëjt bën naj ree mojs, gol bazoob xtiidx ree xpatrondi, gol gojp tëë reeman respejt, ad bën najtzi ree benza'c raya tëë reeman lëjt, në ree bën naj bendxuudx. <sup>19</sup> Din zagdxë naj guial chu rdaan loj guialrzagdiaj, majsi ad rayaltaman laan, rdaanman laan guial rënman güünman ni ruladx Dios. <sup>20</sup> Bal chu lëjt rzagdiaj por ni mal rüjndi, achet lasajcan, per bal rzagdiajdi por ni zagdxë rüjndi abi' rdaandi loj guialrzagdiaj guin, laan lasajc delant loj Dios, <sup>21</sup> din par zian gulejman lëjt. Guzagdiaj Jesucrist por lëjt, zian balüüman lëjt xhienaag guibandi din chinalidi xnejzaman. <sup>22</sup> Ad yu'tczi dxej beenman dol abi' ni'qui tijb diidx rusquiee ad briit ro'man. <sup>23</sup> Chi rëb reeman diidxguijdx lojman, ad badxi'taman laan con diidxguijdx, chi basagzi reeman laaman, ad rëbtaman loj reeman guial yaguijx reeman ni cayüjnnë reeman laaman,

Gui'ch yaløj bacaa San Pedr 2:246Gui'ch yaløj bacaa San Pedr 3:7

graczan basa'nman loj Dios bén rüjn xguialguxtis zi'c rayal. <sup>24</sup> Guzagdiaj Jesucrist loj crüjz por dux tol ree persi babëeman dunuj ree lojn din yabajn ree zi'c rën Dios, abi' por lod bidxeelguijdxaman ma bayüjnman du luxdoo ree naya. <sup>25</sup> Gocli gubajndi zi'c xiil rzëëb, per yan ma najdi xbejn Jesucrist bén rën lëjt rajp tëëman lëjt zi'c tijb bén rajp xiil.

### 3

#### *Zi'c rayal guiban ree bén ca' lasa'*

<sup>1</sup> Në lëjt béngunaa ma yu' ree lacheel, gol bazoob xtiidx lacheelidi, din bal chu lacheelidi ad riladxt xtiidx Dios, per chi guguaa reex zi'c nabandi, dxel guililadx reex. Ad rüjnt naguiejn xhie guiëbidi loj reex, <sup>2</sup> chililadx reex guial guguaa reex nabandi zi'c rayal rajp tëëdi laa reex respejt. <sup>3</sup> Chi rzujchaawidi, ad bal rdëdlaj rüjnchaaw guidxguijquidi ni'qui guial güüнди ujs ganax ni or o gacwidi ganax lajd lasajc. <sup>4</sup> Mazri zagdxë naj guial güüнди naguiejn gac luxdoodi naya delant loj Dios, gol gojc benza'c në bén chaawladx, din laan ad yu't dxej nitan, abi' laan mazri lasajc delant lojman. <sup>5</sup> Din zian gubajn ree béngunaa binal ree xnejzaman goc da't, bililadx reeman laaman bazoob tëë reeman xtiidx lacheel reeman. <sup>6</sup> Zian been Sara, bazoob xtiidx lacheelaman Abraham, abi' guneeman laaman “Dad”. Gaquidi zi'c xi'n Sara, bal rüjndi ni zagdxë sin guialrdxëb.

<sup>7</sup> Ziangajc lëjt xinguaaw, gol gubajnnë lacheelidi zagdxë, gol gojp reeman respejt ad guialzi najt reeman bén nada, rayal güüнди zian guial në reeman rayal guialnaban tiblayaa razaladx Dios, guial najman benza'c. Zian gol gubajn, chitëë xhie gudxe' nawëëg lëjt chi cwedx guini-abidi laaman.

*Xhie rayal güüнди chi xhie güün në reeman lëjt*

Gui'ch yaløj bacaa San Pedr 3:87Gui'ch yaløj bacaa San Pedr 3:19

<sup>8</sup> Zeel rnin loj gradi: Gol gubajnnë lasa'di zagdxe, gol bachajg lasa'di, gol been xgab tijbzi, gol guyën lasa'di zi'c rayal, gol gojc benza'c në Bén chaawladx. <sup>9</sup> Ad yadxi'di ni mal rüjn ree bejn lëjt, ad yadxi'di diidxguijdx ni na reeman lojdi, gol gurejdx Dios din gagnëman laa reeman, din Dios gulej lëjt par gagnëman lëjt. <sup>10</sup> Din rëb loj xtiidxaman:

Bén rën guiban zagdxe chu' tää luxdooman zagdxe, rayal gapaman ciudad ad guinieeman diidxguijdx ad guiniee tääman diidx rusquiee.

<sup>11</sup> Cwëeladxaman ni mal, güünman ni zagdxe güün tääman naguiejn guibannë ree lasa'man zagdxe, zian rayal guibanman zianczi.

<sup>12</sup> Din dux Dad ree Dios rniaj Bén rüjn ree ni rënman rüjncwent tääman xtiidx reeman chi rbejdx reeman laaman, per ralenman Bén rüjn ree ni mal.

<sup>13</sup> Achut güün lëjt ni mal, bal cayüjndi naguiejn güüнди ni zagdxe. <sup>14</sup> Per xiquilbaadi bal cusagdiaj bejn lëjt guial cayüjndi ni zagdxe. Ad chu'di xgab ad guidxeb täädi por zian, <sup>15</sup> gol gojp respejt gol badxe'guijc tää dux Dad ree Jesucrist. Gol guzujsin din yadxi'di xtiidx ree Bén guiniabdiidx lojdi xcwent ni riladxidi, per gol badxi' xtiidx reeman zagdxe con diidx zagdxe ree. <sup>16</sup> Gol gubajn zagdxe din guiguien guial achet ni mal yu'guijquidi din yaya'nxtu ree Bén rnieeguijdx lëjt, guial rüjndi ni zagdxe riladx täädi Jesucrist. <sup>17</sup> Mazri zagdxe naj sagdiaj bejn guial güünman ni zagdxe, bal zian rën Dios, luar sagdiajman guial güünman ni mal.

<sup>18</sup> Din xt Jesucrist guzagdiaj, güjtaman tib voltzi por dux tol ree majsi ad beentaman dol, per güjtaman duxcwent ree nayajc ree Bén dol, zian guxhalaman nejz din gac yadxin ree loj Dios, güjtaman zi'c Bénguidxliuj per babanman por xSprijtaman. <sup>19</sup> Chi gadaman yaban, wej

xSprijtaman bigneenëman xsprijt ree bengüt lod nayaaw reeman. <sup>20</sup> Sprijt guin ree naj xsprijt ree bén ad bazoobt diidx tiamp gulal, chi guban Noé loj guidxliuj guie, chi gop Dios laa reeman pasens la'tgaj cayüjn Noé barcw, abi' xhujnzi bejn gulaa loj nijs banijt guidxliuj tiamp zii. <sup>21</sup> Nijs guin naj zi'c guialrirobnijs ni rulüü guial ma nayajc ree perdon. Guialrirobnijs guin ad rënt guiëban guial najn par gusian dux cuerp ree, rulüün guial caynaab ree loj Dios din yaya dux quiarguejn ree, guial ma raya'p ree guialnaban cüb guial baban Jesucrist loj ree bengüt, <sup>22</sup> bén bayë'p xanyabaa abi' za'man xladbee Dios lod canabeeman anjl ree në ree sprijt ca' guialrniabee.

#### 4

##### *Gol beennë quiarguejn ni banee Dios dxiin*

<sup>1</sup> Zeel zi'c gudëd Jesucrist loj guialrzagdiaj, në lëjt rayal taan lojn. Din por guialrzagdiaj guin rüjn bejn dol tibläd, <sup>2</sup> din güünman zi'c rën Dios guidib xguialnabanman luar güünman zi'c naj xixgabaman. <sup>3</sup> Xchej da't gubajndi zi'c naban ree bén ad nünbeet Dios, gubajndi zi'ctzi guyëndi, beendi zi'ctzi gojc xixgab dxuudxidi, gu'di, badxajg lasa'di persi beendi nidxuux ree, guzüdx da'tidi, guyën tēēdi ni ad najt ree Dios, laan naj ni rbijxhlädx Dios. <sup>4</sup> Per yan guial ad zinaltridi zi'c naban ree bén naban zian, zeel radxa loj reeman, rnieeguijdx tēē reeman lëjt. <sup>5</sup> Per rayal yadēēd reeman cwent loj Dios bén za' par güün xguialguxtisaman con ree bén naban në ree bén ma güjt. <sup>6</sup> Din në ree bén ma güjt bigueiejn xtiidx Dios chi guban reeman loj guidxliuj guie, din guiban reeman loj Dios majsi par ree bénguidxliuj ma güjt reeman.

<sup>7</sup> Ma zidyob dxej nit guidxliuj, zeel gol bastëdguien gol guzujsin tēē din cwedx guiniabidi Dios con guidib luxdoodi. <sup>8</sup> Ad yayanlädxidi guial guiën lasa'di zi'c rayal, din



Gui'ch yaløj bacaa San Pedr 4:99Gui'ch yaløj bacaa San Pedr 4:18

bén rën lasa' rüjnman perdon majsi xhietëez rüjnnë ree-man laaman. <sup>9</sup> Bal yu' tijb xcompniaridi rniab luar lidxidi din yaya'nman, gol badëedsii lidxidi con guidib luxdoodi ad yaleny'a'di. <sup>10</sup> Loj tijb gajdi ma banee Dios quiargueijn din güüнди ni rayal güüнди. Zeel gol been lasa'di yudar con ni rajc rüjнди, din guiguien guial cayüjнди zi'c rayal con quiargueijn ni bazaladxaman lojdi. <sup>11</sup> Bal chu lëjt ca' quiargueijn par gulüü xcompniaridi, rayal guinieedi ni naj diidxli zi'c tal rëb loj xtiidx Dios, ziangajc bén ca' quiargueijn par güünman yudar dux compniar ree, rayal güünman laan con gojl razaladx Dios lojman. Gra ni cayüjнди, gol beenan din guza't ree bejn Dios zagdxе por Jesucrist, bén rayal respejt në guialrniabee zianczi. Amén.

### *Gol gudaan gra guialrzagdiaj*

<sup>12</sup> Gradi compniar raliduladx ree Jesucrist, rënan lëjt, zeel rnin lojdi, ad ru nawëëguidi guial zro' naj loj guial-rzagdiaj cadëdidi, din laan naj zi'c prueb par lëjt. Ad rudi xgab chexc zeel cazajquidi zian. <sup>13</sup> Gol babaali chi cazagdiajdi zi'c guzagdiaj Jesucrist, din ziangajc yabaadi chi guguaaadi xbianiman dxej gui'taman stijb. <sup>14</sup> Xiquilbaadi bal chu na diidxguijdx lojdi guial zinalidi Jesucrist, din gra dxejczі za'në xSprijt Dios lëjt, bén ca' guialrniabee. <sup>15</sup> Achet lasajc bal cazagdiajdi guial bagüjtidi bejn, o por guialgubaan, o por guial rüjнди ni mal o guial rudi lod ad rayaltidi. <sup>16</sup> Per bal chu cazagdiaj guial zinalaman xnejz Jesucrist, ad rayalt yatuman, rayal gudëëman quixtëë loj Dios guial ma najman xbejn Jesucrist.

<sup>17</sup> Gol gogbee, guial rtiëjb Dios rzagdiaj ree xbejnman din guzoob reeman diidx, abi' bal dunuj ree nayajc ree xbejnman cayza'c ree zian, xhieczi naag sac ree bén ad rënt guzoob xtiidxza'caman. <sup>18</sup> Nacli ree bén zinal xnejz Dios nawëëg naj guial yaguaaj reeman xanyabaa, piorli ree

Gui'ch yaløj bacaa San Pedr 4:1910Gui'ch yaløj bacaa San Pedr 5:9

béndol bén ad nünbeet ree Dios, xhiecki naag naj luar lod yayal reeman. <sup>19</sup> Zeel bén cazagdiaj ree zi'c naj xixgab Dios, rayal gusnuu güün reeman ni zagdxé gusa'n tée reeman gran loj Dios, laaman gagné laa reeman. Laaman bazaladx guialnaban rüjn téeëman zi'c rayal.

## 5

### *Consejw par ree bén rliladx Jesucrist*

<sup>1</sup> Yan rėnan gudėdan consejw loj ree bén rniabee ree lojdi, naj guial ca'n guialrniabee zi'cgajc laa reeman, naj tėėn testiw xcwent ni guzagdiaj Jesucrist, zi'cgajc laa reeman guguiian xbianiman dxej gui'taman stijb, zeel rėnan guiėn nine ree loj reeman. <sup>2</sup> Rnin lojdi, gol gunaj ree xbejn Jesucrist, bén rayal ree gulüüdi din gusnuu chinal reeman xnejz Dios. Ad güüندی dxiin guin guialzi ragbeedi rayal güüندی laan, gol beenan guial yu'di gan güüندی laan, con guidib luxdoodi gol beenan, ad bal güüندی laan guialzi rzėėbladxidi milia. <sup>3</sup> Ad guial ca'tidi guialrniabee din nabeedi zi'c tal rėndi, rayal guibandi zagdxé din guguiiaa ree bén rliladx Jesucrist din guiban reeman zian, <sup>4</sup> din chi gui't bén rniabee dunuj ree stijb, dxel guneeman tijb niza'cdxoon ni ad yu't dxej nit.

<sup>5</sup> Ziangajc lėjt xinguiag, gol bazoob xtiidx ree bengol. Gradi zi'c xinguiag ree zi'c ree bengol, gol been naya gol bazoob tée xtiidx ree xcompniaridi, din:  
Ralen da't Dios bén rüjn ree benro',  
per dád benza'can con ree bén rüjn naya.

<sup>6</sup> Zeel gol been naya loj Dios, bén ca' gra guialrniabee, din guiliesaman xvaloridi chi guidxin dxej. <sup>7</sup> Gol basa'n gra xgab yu'di loj Dios, din laaman rniaj lėjt.

<sup>8</sup> Gol guzujsin, gol gojp cudad, din xindxab xin ralen da't lėjt, za'x zi'c tijb beedx rliaan, rguuilix chu güünx gan. <sup>9</sup> Zeel ad tiėbidi güünx lėjt gan, gol guzujdxi'ch loj

Gui'ch yaløj bacaa San Pedr 5:1011Gui'ch yaløj bacaa San Pedr 5:14

ni rliladxidi, din ragbeedi guial zi'c cazagdiajdi, ziangajc cazagdiaj ree b n rliladx Jesucrist guidib guidxliuj. <sup>10</sup> Per chi ma gud didi ta'n loj guialrzagdiaj, dxel gagn  Dios din gusnuu g  ndi naguiejn guibandi zi'c r nman, su t  di rejs, sudxi'chidi, gap t  di segur guial zinalidi xnejzaman. Laagajcaman naj Dios cay jn dunuj ree yudar loj gra ni cayza'c ree, abi' ma gulejman dunuj ree din yayal ree tiblayaa lod rniabeeman guial nachajg ree Jesucrist. <sup>11</sup> Laaman rayal respejt, din tijbzi laaman ca' guialrniabee zianczi. Am n.

*Diidx bigra ca ree loj gui'ch guie*

<sup>12</sup> Silvan, tijb dux compniar ree, b n ragbeen naban zi'c r n Dios, laaman been gui'ch guie din ganin lojdi tio'p choon diidx, par gunen l jt consejw n t   par gugojnan l jt guial diidxli r n Dios l jt, zeel gol basnuu gol guy nman gol guy n t   lasa'di. <sup>13</sup> B n rliladx ree Jesucrist, b n ma gulej Dios zi'cgajc l jt, b n zojb ree Babilonia, rugajpdioz reeman l jt. N  Marcw xin n nan zi'c da xi'nan rugajpdioz l jt. <sup>14</sup> Guial r n lasa'di, gol bagajpdioz lasa'di xhiet  z horan radxaaglojdi. Yabe'cdxe Dios luxdoodi guial ma nuchajguidi Jesucrist.

## Xtiidx Dios

New Testament in Zapotec, Santo Domingo Albarradas  
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

### Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 14 Jun 2022 from source files dated 13 Jun 2022

fb4ebcb8-e1f4-5bfc-b08c-f590e137d86d